

Powšitkowne WOZJEWJENJA

njedźelu, 19. měrca 2023

Wusyłanje Božej mše

Serbskorěčnu Božu mšu móža wěriwi tutu njedźelu, 19. měrca, w 9.00 hodź. znowa jako livestream z Chrósćic scěhować. Link na nju je w interneće pod www.posol.de kaž tež na wosadnej stronje podaty.

Kemše w Róžeńće

Na swjedženju Přizjewjenja Knjeza, sobotu, 25. měrca, budu w Róžeńčanskej hnadownej cyrkwi kemše w 9 hodź. Wšitcy wěriwi su na nje wutrobnje přeprašeni.

Spowědź w Róžeńće

Přiležnosć k swjatej spowědži w Róžeńće budže sobotu, 25. měrca, wot 17 do 18 hodź. Spowědnicy budu tachantski farar Wito Šćapan, fararjej Michał Anders a Šćěpan Delan kaž tež pater Johannes Wernersbach. Dalše terminy budu hišće wozjewjene.

Terminaj za młodostnych

Serbscy młodostni su na modlenje vesper sobotu, 25. měrca, w 20 hodź. do Kulowa přeprašeni. Zhromadne modlenje křižoweho puća budže bołmončku, 2. apryla, w Pěskecach. Započatk je w 14.00 hodź.

Premjera w Sulšecach tydzień pozdžišo

Nowa inscenacija „Tónkróc něšto z niwowom“ Kulowskeho Bratrowstwa njezměje chorosće dla tutu njedźelu, 19. měrca, ale hakle njedźelu, 26. měrca, w 17.00 hodź. w Sulšecach swoju premjeru. Dalše terminy předstajenjow njejsu hišće jasne.

Hudźbny nyšpor w klóšterskej cyrkwi

Na hudźbny nyšpor su wěriwi njedźelu, 19. měrca, do klóšterskeje cyrkwy w Pančicach-Kukowje přeprašeni. Započatk je w 16.30 hodź. Jón wuhotuja cistercienske sotry, cyrkwinskohudźbny direktor Friedemann Böhme na piščelach kaž tež Tobias Witke na saksofonje a klarineće.

Zhromadny dzeń za šulerjow wot 6. do 8. lětnika

Pod heslom „Wujednaj so!“ su šulerki a šulerjo wot 6. do 8. lětnika sobotu, 1. apryla, wot 9.00 do 13.30 hodź. do Don Boskoweho domu we Worklecach přeprašeni. Tón dzeń móža sakrament wujednanja přijimać. Za wudawki dnja zběraja wot kóždeho wobdźělnika přinošk pjeć eurow. Přizjewić měli so hač do pónđzele, 27. měrca, na internetowej stronje dekanatneho dušepastyrstwa za džěci a młodžinu. Link na nju je pod www.posol.de wozjewjeny.

Rituale při přechodach žiwjenja

„... přez lěto, přez žiwjenje – rituale jako pomoc w žiwjenskich přechodach“ rěka hesło zarjadowanja, kotrež wotměje so sobotu, 22. apryla, w Smochčanskim kubłanišću swjateho Bena. Mjez druhim předstajitaj referentaj wšelake rituale w běhu žiwjenja, a zajimcy změja po přeću składnosć, sej sami ritual za sebje abo za wosebitu žiwjensku situaciju wutworić. Link k nadrobnym informacijam je pod www.posol.de podaty.

Hłowna zhromadźizna TCM

Předsydstwo Towarstwa Cyrila a Metoda z.t. (TCM) přeprašuje wšitkich člonow towarstwa, člonow sekcijow a korporacijow na swoju hłownu zhromadźiznu wutoru, 21. měrca, do Baćonja. Započnjemy we 18.00 hodź. z Božej mšu w cyrkwi Jezusoweje wutroby. Přizamknje so zhromadźizna. Slědowacy dnjowy porjad je předwidžany:

1. powitanje a zahajenje
2. wólba nawody zhromadźizny
3. rozprawa předsydstwa
4. rozprawa korporacijow a sekcijow
5. financna rozprawa
6. rozprawa rewizijneje komisije
7. diskusija a schwalenje rozprawow
8. financna podpěra džěła towarstwa
9. wotewrjena diskusija
10. zakónčenje a zhromadna modlitwa

Cyryl Hančik, předsyda TCM

Do hłowneje zhromadźizny a po njej změja člonoj so składnosć, swój lětny přinošk pjeć eurow zapłaćić.

Katolsku nabožinu wuwučować

Zajimcy, kotřiž chcyli katolsku nabožinu wuwučować, móža lětsa nazymu wotpowědne wukubłanje zahajić a so přez studij wučerstwa, trajacy po šulskej družinje štyri do pjeć lět, za to kwalifikować. Naslědne šulskopraktiske wukubłanje, tak mjenowany referendariat, traje něhdže połdra lěta. Wuměnjena mjez druhim su, zo so zajimcy za křescansku wěru zajimuju, zo so aktiwne na cyrkwiskim žiwjenju wobdžěleja, ale zo su zdobom komunikatiwni, fleksibelni a kmari w teamje kaž tež z młodymi ludźimi hromadze džělać. Zajimcy měli so na Drježdžanskej Techniskej uniwersiće přizjewić. Požadanska doba za zymski semester, w kotrymž móža studij zahajić, traje wot štwórtka, 1. junija, hač do soboty, 15. julija. Dalše informacije dóstanu zajimcy we wotrjedze za šule a wysoke šule biskopskeho ordinariata w Drježdžanach kaž tež pod www.posol.de. Tam je wotpowědny link k nadrobnemu wupisanju podaty.

Putnikowanje swójbow

Lětuše putnikowanje swójbow do Róžanta wotměje so pjatu póstnu njedźelu, 26. měrca. Boža mša w hnadownej cyrkwi zahaji so w 9.00 hodź.

Dny rozpominanja

K dnjam rozpominanja a nutřkowneho přihota na martrowny tydžeń přeprašuju sotry klóštra Marijineje hwězdy wot pjatka do njedźele, 31. měrca do 2. apryla. Dny wobsahuja impulsy, spěwy a ćišinu, wosobinske reflektowanje kaž tež wuměnu w skupinje. Ličba wobdžělnikow je na dwanaće wosobow wobmjezowana. Link k nadrobnějším informacijam a k přizjewjenju je pod www.posol.de wozjewjeny.